

SOL DI PUEBLO

BRIYANDO FUERTE • TRECIENDO CLARIDAD

**CON E LEYNAN
DI ARUBA TA
CASTIGA UN
ASESINATO Y
CUANTO AÑA
HUES POR
DUNA?**

**DIFERENCIA ENTRE
DOODSLAG Y MOORD**



DOODSLAG	MOORD
⚡ Acto impulsivo	📋 Acto planea
🕒 Sin plan previo	📅 Plan previo (premeditacion)
👤 Rabia di momento	🎯 Reflexion i decision
15 AÑA DI PRISON	30 AÑA O PRISON i POR BIDA

**PARLAMENTARIO XIOMARA MADURO TA
CUESTIONA E SCURIDAD CU MIKE EMAN
TIN E DEMOCRACIA DI ARUBA ADEN**



PAPIAMENTO DEN HOFI: UN ANOCHI DI CULTURA Y CELEBRACION DI NOS IDIOMA

ORANJESTAD, 24 di mei 2026: Fundacion Lanta Papiamento (FLP) ta anuncia cu su celebracion di Oficialisacion di Papiamento e aña aki ta tuma luga diaranson dia 27 di mei 2026 bou di e titulo "Papiamento den Hofi".

E evento ta un anochi cultural y educativo dedica na promocion y celebracion di nos idioma Papiamento y reflexion riba su importancia como nos idioma materno.

FLP ta expresa su satisfaccion cu e aña aki diferente organisacion na Aruba a dedica atencion na Papiamento dia 21 di mei, fecha cu ta marca 23 aña di oficialisacion di Papiamento na Aruba. Esaki ta demostra cu tin un crecimiento di conscientisacion den comunidad tocante e valor di nos idioma como parti esencial di nos identidad y patrimonio cultural.

E programa "Papiamento den Hofi" ta inclui exhibicion di video tocante historia y desaroyo di Papiamento cu discusion

despues, charla, poesia, contamento di storia, bendemento di buki, baile y musica. Ademas lo tin un microfon habri pa participante cu kier comparti un poema of historia cortico na Papiamento. Esnan interesa por inscribi na yegada of adelanta via telefon of WhatsApp na number 567-4699.

E evento ta tuma luga den sala y cura di Arubiana, e departamento di Biblioteca Nacional Aruba

(BNA) na Bachstraat 5, dia 27 di mei di 6:30 or pa 9:00 or di anochi. Entrada ta completamente gratis.

Fundacion Lanta Papiamento ta invita pueblo di Aruba di turedad pa participa na e evento cultural aki y demostra amor pa Papiamento y compromiso cu su preservacion y futuro.

"Papiamento, nos idioma, nos derecho!" ta e mensahe central cu FLP ta kier comparti cu comunidad durante e celebracion aki.



Papiamento den Hofi

Celebracion 23 aña di oficialisacion di Papiamento

...

Diaranson 27 di mei 2026

Un atardi pa celebra nos idioma, historia y cultura

6:30 pm - 9:00 pm

Luga: Hofi Arubiana-Caribiana, Bachstraat 5

Charla | Video | Poesia | Contamento di storia
Baile | Bendemento di buki | Musica
Dicho - Proverbio

Entrada Gratis




Clasificados



SOLODIPUEBLO@GMAIL.COM
CEL. 585 9500



CON E LEYNAN DI ARUBA TA CASTIGA UN ASESINATO Y CUANTO AÑA HUES POR DUNA?

Cuanto aña di prison un hende ta haya pa mata otro na Aruba?

E noticia tristo di fayecimento di e hoben Rayden Kock (17 anja) a conmeve comunidad di Aruba. Den momento di un tragedia asina, hopi hende ta puntra nan mes: Kico exactamente e ley di Aruba ta bisa tocante e castigo pa un persona cu ta kita bida di otro?

Pa compronde esaki, nos tin cu acudi na e fuente oficial: e Wetboek van Strafrecht di Aruba (Codigo Penal), aproba dia 27 di april 2012 y actualisa localmente. Siguiientemente, nos ta presenta un analisis detaya y facil pa compronde tocante con castigo ta wordo calcula na nos pais.

1. E base: Cuanto aña maximo un hues por duna? (Artikel 1:13)
Prome cu un hues dicidi riba un caso di asesinato, e tin cu respeta e limitenan maximo cu ley ta impone en general. Artikel 1:13 ta e macro legal cu ta contene tur e reglanan basico pa castigo di prison na Aruba. E cantidad di aña menciona ta maximo. Cada caso ta wordo midi diferente y esey ta keda finalmente den man di hues. Sinembargo Hues tin un menu di castigo, cu tin margen, pues cu e por yega te na e maximo, pero no ta obliga di duna e maximo.

Artikel 1:13:

1. De gevangenisstraf is levenslang of tijdelijk.
 2. De duur van de tijdelijke gevangenisstraf is ten minste een dag en ten hoogste vijftien achtereenvolgende jaren.
 3. Zij kan voor ten hoogste dertig achtereenvolgende jaren worden opgelegd in de gevallen waarin op het misdrijf levenslange en tijdelijke gevangenisstraf ter keuze van de rechter zijn gesteld [...]
- Splicacion Pratico di e Nivelnan:
E ley tin tres nivel principal di

prison temporal:

Maximo 15 aña: Esaki ta e limite standard pa e mayoria di delitonan grave temporal.

Maximo 20 aña: Esaki ta conta ora un hende intenta mata un persona pero e victima ta sobrevivir (intento), si e persona tabata un complice, of si el a comete varios delito distinto na mes momento.

Maximo 30 aña o di por bida (Levenslang): Esaki ta un excepcion, aplicabel solamente si e ley mes ta duna hues e opcion especifico pa scoge entre prison di por bida o castigo temporal. Esaki ta e caso di moord.

2. E menu di castigo: Castigo maximo vs castigo real cu hues duna

Un punto hopi importante cu hopi hende den comunidad no sa, ta cu e cifranan aki (15 o 30 anja) ta e limite maximo (e plafond) cu e ley ta permiti. Esaki kiermen cu Hues tin e libertad completo pa duna un castigo mas abao, depende di e circunstancianan di e caso.

Por ehempel, si e maximo pa un delito ta 15 aña, e Hues tin e poder pa dicta un castigo di 10 aña, 8 aña, o cualkier cantidad cu e ta haya proporcional, basta e ta den e rango cu ley ta stipula.

Factornan cu Hues ta balansa pa determina e añanan exacto:

Factornan cu por subi e castigo (cerca di e maximo): Si e acto tabata sumamente brutal, si e acusado tin antecedente penal (reincidente), o si e delito a causa un ola di panico den comunidad.

Factornan cu por baha e castigo: Si e acusado ta un hoben hopi jong (caminda por aplica derecho penal hubenil), si el a coopera cu polis y a muestra arepentimento sincero, o si tabatin un provocacion extremo di parti di e victima net prome cu e suceso.



3. E gran diferencia: Doodslag contra Moord

Hopi hende ta uza e palabranan “homicidio” y “asesinato” manera ta mesun cos, pero pa ley tin un diferencia enorme cu por nifica te cu 15 aña mas di prison.

A. Doodslag (Homicidio Spontaneo) — Artikel 2:259 “Hij die opzettelijk een ander van het leven berooft, wordt, als schuldig aan doodslag, gestraft met gevangenisstraf van ten hoogste vijftien jaren of geldboete van de vijfde categorie.”
“E persona cu intencionalmente priva un otro di bida, ta culpabel di homicidio (doodslag), y por haya un castigo di maximo 15 anja di prison.”

E palabra clave: “Opzettelijk” (Intencional). E agresor tabata tin e intencion directo di mata den e momento ey, pero e no a planea esaki di antemano.

B. Moord (Asesinato Planea) — Artikel 2:262 “Hij die opzettelijk en met voorbedachten rade een ander van het leven berooft, wordt, als schuldig aan moord, gestraft met levenslange gevangenisstraf of tijdelijke van ten hoogste dertig jaren of geldboete van de vijfde categorie.”

“E persona cu intencionalmente y cu un plan previo priva un otro di bida, ta culpabel di asesinato (moord), y por haya prison di por bida (levenslang) o un maximo di 30 anja.” E frase clave: “Met voorbedachten rade” (Premeditacion / Cu plan previo). Esaki kiermen cu e agresor tabata tin tempo pa pensa, balansa su decision prome cu el a comete e acto.

Den e caso lamentabel di Rayden Kock, e trabao di Recherche y Ministerio Publico ta precisamente pa investiga si e conflicto anterior cu tabata biba entre e e partidonan, ta proba legalmente cu tabatin un plan previo o premeditacion (voorbedachten rade).

Finalmente

E investigacion forensico y tactico mester determina structuralmente e caminda legal cu e caso aki lo tuma. Comunidad di Aruba ta exige transparencia y e famia ta merece husticia. Ley di Aruba structuralmente ta duna e hermentnan necesario na e Hues pa dicta un sentencia final proporcional, aplicando e Wetboek van Strafrecht pa castiga e culpabel na forma debido y evaluando e caso segun su mesun circunstancianan unico.



Noticiadi Corte

CASO PENAL CONTRA EX MIEMBRO DI GUARDA COSTA POSPONI

ORANJESTAD – Awe mester a tuma lugar e caso penal cu Ministerio Publico a cuminsa contra e homber E.J.F. (33), ex miembro di Guarda Costa. Fiscal ta acusa E.J.F. di diferente delito. Ariba peticion di abogado mr. Carlo, Hues a pospone tratamento di e caso.

SOLO DI PUEBLO por a compronde cu abogado mr. Carlo a manda mail pa Hues informando cu Fiscal a manda e documentonan laat y e no a haya tempo di studia esakinan hunto cu su cliente.

ACUSACIONNAN

Ta asina cu E.J.F. no a presenta den Corte. Abogado mr. Carlo a bisa Hues cu door cu E.J.F. no ta di acuerdo cu a cuminsa un caso penal, e no a presenta pero lo bay ta presente ora di tratamento di e caso.

Fiscal a bisa cu e acusacionnan contra E.J.F. ta:

- Dia 13 Maart 2023, hunto cu otro nan a horta un motor di boto, usando su poder of

oportunidad como miembro di Guarda Costa.

- Fiscal també ta acusa E.J.F. di incubrimiento di flares y balanan entre 4 Maart y 11 Maart 2023.

- Fiscal també ta acusa E.J.F. di a mata of a herida un cantidad di calco, siendo animalnan proteho pa ley.

- Fiscal ta acusa E.J.F. di a pone otro nan (door di regalonan, promesanan, mal uso di autoridad, violencia, menaza of estafa) of door di duna nan oportunidad/informacion, a mata of herida calconan entre Augustus 2023. A duna intencionalmente informacionnan tocante piki calco den awanan teritorial di Aruba y paga of haci palabracionnan tocante compra/pago di calco.

HUES A POSPONE E CASO

Hues a bisa cu e intension tabata pa trata e caso pero abogado mr. Carlo a haci un peticion pa pospone e caso, door cu el a haya e documentonan di e caso laat. Hues e ora ey a pensa pa haci e tratamento un forma caminda

abogado por haci peticion si e kier pa haci cierto investigacion.

Abogado a bisa Hues cu ta imposibel pa e haci peticion pasobra e no a haya chens di studia e caso cu su cliente. El a bisa Hues cu na December 2025 tabatin Tomzitting, caminda E.J.F. a nenga di acepta castigo pasobra cu e no ta haya cu e ta culpabel y Fiscal a laga sa cu lo bin un caso penal.

E abogado a bisa Hues cu el a pidi Fiscal diferente biaha pa haya documentonan di e caso. Awor, el a haya e documentonan laat y no a haya chens prepara e caso. Ariba pregunta di Hues, abogado mr. Carlo a bisa cu e ta kere cu pa fin di Juni 2026, e lo manda su peticionnan pa tanto Fiscal como Hues. E abogado a splica cu e lo ta cla e ora ey di a consulta y studia e caso cu su cliente. Mr. Carlo a bisa Hues cu henter e caso ta basa riba tap di su cliente. E ta haya kico tabata e motibo cu a tap su cliente. També el a muestra cu tin diferente testimonio cu e kier lesa nan declaracion promer cu e bay haci peticionnan.

Hues a bay di acuerdo y fiha un otro regie zitting pa 6 Augustus 2026.

COA Y PANAM SPORTS TA REUNI CU MINISTER DI DEPORTE



Awemainta na oficina di Gobierno di Aruba, miembronan di Directiva y Directornan di Comité Olimpico Arubano (COA) hunto cu Presidente Neven

Ilic y Secretaria General Jimena Saldaña di Panam Sports a reuni cu Minister di Deporte mr. Gerlien Croes hunto cu Kristel Brown cu ta encarga cu

deporte.

E reunion a mira un conversacion ameno y fructifero, unda a explora

ideanan pa traha riba e desaroyo di deporte na Aruba. Panam Sports a indica di ta hopi dispuesto

pa colabora cu Gobierno di Aruba y COA pa yuda logra mehora deportivo di nos isla.



Ministro encarga cu Salubridad ta anuncia cu entrante **27 mei 2026** durante 14 dia lo tin oportunidad pa un y tur tuma conocimiento na Departamento di Legislacion y Asunto Huridico, **Schotlandstraat 53**, di un peticion cu a ser haci pa obtene un **koffiehuis- y un restaurantvergunning A** pa e parcela na **Vuylestekestraat 1**. E permisionan aki ta concerni e.o. benta di bebida sterki por detal y cuminda pa wordo consumi den e parcela. Den e periodo aki tur hende por expresa por escrito nan desacuerdo contra dunamento di e permisionan menciona, dirigi na e Ministro encarga cu Salubridad via intermediacion di Director di Departamento di Legislacion y Asunto Huridico, Schotlandstraat 53.

PARLAMENTARIO XIOMARA MADURO TA CUESTIONA E SCURIDAD CU MIKE EMAN TIN E DEMOCRACIA DI ARUBA ADEN



Mientras cu Prome Minister Mike Eman ta duna entrevista na television nacional na Hulanda pa presenta su 'vision' pa Aruba, e ironia grandi ta cu na Aruba mes pueblo no ta ricibi e mesun claridad. Hulanda ta tende bon con Eman kier pinta futuro di Aruba, pero na Aruba mes tur hende ta keda den scuridad tocante e impacto real di decisionnan cu lo determina nos futuro economico y politico.

Rijkswet HOFA: Silencio di Eman vs Preocupacion di Pueblo

Un ehempel cla ta e discusion riba e Rijkswet HOFA, e ley cu ta trata supervision financiero di Aruba den un bachi legal nobo, cu ya a crea hopi preocupacion tocante autonomia di nos pais. Diferente medio y analista a confirma cu e tema aki ta provoca tension y preocupacion serio den sociedad y den Parlamento. Sinembargo, unda e comunicacion serio di Eman ta pa splica pueblo kico ta pasando den gobernacion?

Parlamentario Maduro ta puntra, unda e conferencia di prensa amplio di Eman a keda pa splica pueblo na manera

cla: kico exactamente HOFA ta nifica, ki poder Aruba lo perde of mantene, con e acuerdo lo afecta e ciudadano, y pakico Gobierno ta considera esaki ta asina necesario? "Liderato responsabel ta exige dialogo directo cu pueblo, cu transparencia y respet. En bes di esey, e unico noticia cu Eman ta duna via television na Aruba ta, unda ta piki sushi den bario y ki dia tin fiesta di Ban Bek Caya. Un campaña permanente di imagen y nada importante tocante deuda, autonomia y gobernacion en general," Parlamentario Maduro ta enfatiza.

Medio internacional y local ta raporta cu den Parlamento tin preocupacion cu e proceso rond di HOFA no tabata suficientemente democratico y tampoco transparente. Si parlamentarionan mes ta expresa falta di claridad, con por spera cu e pueblo lo sinti nan mes bon informa?

Aruba merece un gobierno cu no ta core pa pregunta dificil. Un gobierno cu no ta comunica solamente ora cu tin camara internacional presente. "Aruba mester di un Minister President cu ta papia cla cu su pueblo, den idioma



cu pueblo ta compronde, y cu ta trata ciudadano manera adulto capas di compronde e realidad. Democracia no ta funciona cu mercadeo politico y campaña permanente so. Democracia ta funciona cu informacion,

transparencia y responsabilidad. E minimo cu Eman por haci ta informa pueblo cu honestidad y claridad," Parlamentario Maduro ta expresa.

AUMENTO DI BIENTO TA TRECE

MAS STOF

Y MAS KEHONAN

DI ALERGIA

Proteha bo salud.
Tuma precaucion.

NISTERMENTO
FRECUENTE

WOWO IRITA
Y TA BASHA AWA

NANISHI
CERA

DIFICULTAD
PA HALA ROSEA

Bo Salud, nos prioridad!



Noticia di Corte

A POSPONE CASO PENAL CONTRA HOMBER CU A HINCA DAMA DIFERENTE BIAHA CU CUCHIU DEN GARGANTA

ORANJESTAD – Den Corte di Husticia, Hues a bay pa trata e caso penal cu Ministerio Publico a cuminsa contra e homber E.B.C., acusa di intento di mata. Sinembargo, abogado a pidi Hues pa pospone e caso.

SOLO DI PUEBLO por a compronde cu ta acusa E.B.C. di a hinca e dama E. diferente biaha cu un cuchiu den garganta. Abogado mr. Arends Marchena a pidi Hues cu e kier pa psiquiatra evalua E.B.C., kende a bisa cu e no ta corda nada di loke el a haci.

HINCA DAMA CU CUCHIU NA GARGANTA

Den sala di Corte tabata presente famianan di e sospechoso E.B.C. y tambe e victima, e dama E., tabata presente. E acusacion cu Fiscal a presenta contra E.B.C. ta cu riba 11 Februari

2026, E.B.C. a purba mata e dama E. Fiscal a bisa cu E.B.C. a hinca e dama E. diferente biaha cu cuchiu den garganta.

ABOGADO KIER INVESTIGA SOSPECHOSO

Abogado mr. Arends Marchena a pidi Hues pa pospone e caso pasobra e kier mas investigacion. E abogado a bisa Hues cu e kier investigacion psiquiatrico. E abogado a bisa cu E.B.C. no ta corda nada di loke a sosode. Tambe e abogado a pidi Hues pa interroga e homber A.B. kende a presenta na e cas net despues di e incidente. E abogado ta kere cu A.B. lo por splica kico tur el a mira y e situacion emocional di E.B.C. E abogado a pidi Hues pa e video di e incidente, cu a graba riba camera di seguridad.

Fiscal a bisa Hues cu e no tin problema cu

video. Pa loke ta investigacion psiquiatrico, Fiscal a bisa cu e no tin nada contra. El a sigui bisa cu e no tin nada contra pa scucha A.B.

CASO POSPONE

Hues a bisa cu e ta aproba e peticion di abogado mr. Arends Marchena, pa scucha A.B. riba e situacion emocional di E.B.C. Tambe e investigacion psiquiatrico. Hues a pospone e caso pa 4 September 2026 pa 10.30 di mainta. Hues a puntra e victima E. si e lo bay haci demanda di daño. E victima a bisa Hues cu e no ta bay haci demanda di daño pero si kier haci uso di su derecho di hiba palabra. Hues a bisa cu e ta manda e caso pa Hues Comisario interroga A.B.

AWA A DRENTA DEN BOTO! WARDACOSTA Y PISCADORNAN A SALBA 5 BIDA DEN AWA DI ARUBA

Den ora nan di dialuna mainta, Centro Operacional Maritimo di Wardacosta a capta un mensahe di emergencia via di canal VHF 16. Ta trata di un boto tipo charter cu 5 persona abordo pidiendo asistencia riba lama. E boto tawata nabegando den awa nan di Aruba y di un momento pa otro awa a cuminsa drenta den e boto. Inmediatamente a pidi asistencia di e helicopter di Wardacosta pa asina monitor e situacion y simultaneamente dos unidad di Metal Shark

a sali for di Savaneta pa yuda.

Diferente boto di piscado den e area tambe a tuma nota di e mensahe riba canal 16 y nan tambe a bai den direccion di e boto pa asina por yuda debidamente.

Hunto cu e unidad nan di Metal Shark y diferente boto den becindario, a logra di compana e boto pa asina e por yega 'safe and sound' ta na pier di Renaissance marina.



Un danki ta bai na tur boto cu a asisti durante di e mision di rescate

aki. Esaki ta demostra con hunto cu comunidad riba lama nos por zorg pa

siguridad maritimo. Hunto nos ta fuerte.

Na caminda pa Mundial



NINGUN PAIS POR KITA E RECORD DI GOL DI BRASIL Y ALEMANIA E AÑA AKI

Brasil y Alemania, e dos potencianan mas grandi di Copa Mundial, ta comparti un record cu lo no ta den peligro den e torneo di e aña aki: un cifra identico di 18 partido sigui anotando gol hinca mas cu un biaha.

E grandura di e marca aki ta keda bisto ora mira e seleccion di Argentina, campeon mundial actual. E albiceleste tin e racha habri mas largo formalisa den e momentonan aki, cu un cadena di nueve partido mundialista consecutivo logrando por lo menos un gol (e ultimo dos di Rusia 2018 y e shete di Qatar 2022).

Aunke Argentina lo por desplega tur su potencial ofensivo na Norte America y hunga e maximo di 8 partido te cu e final anotando den cada uno, su cuenta lo para na 17 gol sigui. Cu esaki, e reinado di Brasil y Alemania ta segura pa keda intacto por lo menos te cu aña 2030.

E racha di e seleccion Brasileño a cuminsa for di su prome partido den historia di e torneo na Uruguay 1930 y a dur te e edicion di Suiza 1954. E cadena a caba cu un empate 0-0 contra Inglaterra den e fase di grupo na Suecia 1958.

Alemania, di su banda, a demonstra



su constancia logrando e mesun cifra di 18 partido den dos era diferente. E prome racha a bay di Italia 1934 te cu e prome encuentro na Chile 1962, unda un empate sin gol contra e seleccion di Italia a para e conteo. E di dos racha Aleman a cuminsa na Mexico 1986 y a caba na Francia 1998, ora Croacia a elimina nan cu un goliada di 3-0 den cuartonan di final.

Top anotadornan den e historia di Mundial

Asina manera e seleccionnan a resalta, individualmente tambe tabatin hungadornan cu a laga nan

marca. E Frances Just Fontaine na Suecia 1958 y e Brasileño Jairzinho na Mexico 1970 a dicta catedra ora nan a marca gol den tur e 6 partidonan cu nan a hunga den e torneonan ey.

Tras di nan tin un lista di hungado cu a logra marca den cinco partido consecutivo, unda ta destaca nombrenan manera Gerd Müller, Eusébio, Leônidas, Teófilo Cubillas, James Rodríguez, Rivaldo y Hristo Stoichkov.

Cu e formato nobo di e torneo cu ta permiti un maximo di ocho partido na Norte America, e marca di Fontaine y Jairzinho si

por core peligro matematico di cay. E hungado cu tin mas chens di core e record aki ta e Argentino Lionel Messi, kende actualmente tin un racha di cuater partido sigui anotando gol (contra Australia, Hulanda, Croacia y Francia na Qatar 2022).

Falta apenas un paar di siman pa e weganan cuminsa, unda atacadonan manera Erling Haaland of Kylian Mbappé lo busca pa asimila e regularidad di e hungadonan mitico aki pa asina laga nan propio seyo y yuda nan paisnan acerca na e marca historico di Brasil y Alemania.

FRACCION AVP TA DESTACA IMPORTANCIA DI DIALOGO CU IMSAN PA FORTIFICA CUIDO DI SALUD



ORANJESTAD (25 di mei 2026) – Como parti di su compromiso continuo cu e bienestar di pueblo Arubano y fortalecimiento di nos sistema di salud, e miembronan di Fraccion AVP recientemente a participa den un encuentro productivo cu e management team di IMSAN durante un reunion di Comision di Salud. Durante e bishita, e parlamentarionan tambe a ricibi un recorrido amplio den e facilidadnan, permitiendo nan conoce di cerca e operacion y servicionan cu IMSAN ta brinda diariamente na

comunidad.

E encuentro a crea un espacio valioso pa intercambio di informacion tocante diferente aspecto relaciona cu cuidu di salud na Aruba. Entre e temanan trata tabata e desafionan cu e sector ta confronta actualmente, e necesidad di sigui inverti den calidad y eficiencia, y e importancia di mantene colaboracion estrecho entre e diferente entidadnan cu ta forma parti di e cadena di cuidu medico na Aruba. Segun Fraccion AVP, bishitanan manera esaki ta fundamental pa por



haya un comprension mas profundo di e realidad diario cu profesionalnan di salud ta confronta y di e necesidadnan existente den e sector. E parlamentarionan a expresa nan reconocimiento pa e dedicacion, profesionalismo y compromiso di e empleadonan y directiva di IMSAN, kende diariamente ta contribui na garantisar cuidu digno y servicio di calidad pa pashentnan na Aruba.

“Panos como representante di pueblo, ta importante mantene contacto directo cu e institucionnan cu ta desempeña un rol esencial den nos sociedad. Solamente door di dialogo habri y intercambio franco di informacion nos por logra un comprension completo di e retonan existente y identifica solucionnan sostenibel cu

ta beneficia comunidad,” segun Fraccion AVP.

Durante e recorrido, e miembronan di fraccion a haya oportunidad pa observa diferente area di e facilidad y tende directamente di e personal, e experiencia y prioridadnan cu ta guia e trabou diario di IMSAN. Segun AVP, e tipo di encuentro aki fortalece e relacion entre parlamento y e sector di salud, creando un base mas solido pa formulacion di politica publico y decisionnan informa.

Fraccion AVP a enfatiza cu inversion den salud no solamente ta relaciona cu infraestructura y


recurso, sino tambe cu apoyo continuo na e profesionalnan cu ta dedica nan carera na sirbi comunidad. E fraccion ta considera cu colaboracion, comunicacion y transparencia entre tur actornan relevante ta esencial pa logra un sistema di salud resistente y prepara pa futuro.

Na final di e encuentro, Fraccion AVP a reafirma su compromiso pa sigui impulsa iniciativanan y participa activamente den dialogonan cu ta contribui na un sistema di salud moderno, accesibel, eficiente y di calidad pa tur ciudadano di Aruba.



PASHENTNAN TA APRECIA RACHEL PA SU PROFESIONALIDAD Y POSITIVISMO

Empleado di luna april di HOH ta Rachel Charles



Riba dia di enfermeria, esta 12 di mei enfermera Rachel Charles di departamento A2 no tabata sospecha nada ora ela cana drenta e sala di reunion. Asina cu ela mira su famia para eyan hunto cu tur tres miembro di Hunta di Directiva y tambe coleganan ela keda ful sorprendi y a bira emocionada. Un dia y sigur

un momento inolvidabel unda cu merecidamente Rachel a wordo poni den 'spotlight'. Palabranan di elogio no tabata falta pa tur e trabou ehemplar cu e ta eherce na HOH cu a sigui despues cu un celebracion riba su piso.

Rachel Charles ta un tremendo enfermera pa su pashentnan y un



excelente teamplayer riba piso. E ta un colega semper alegre y yena di energia. E ta sumamente flexibel y ta un sosten hopi grandi pa su coleganan. Semper por conta riba dje sin importa cu druk e por ta, e tin un bon bista riba tur cos andando y e ta responde lihe riba pregunta of situacionnan cu por surgi. Semper e ta para cla pa su pashentnan cu ta aprecia Rachel pa su profesionalidad y positivismo. E ta duna nan un bon guia y cuida despues di operacion y ta percura pa nan sinti nan mes safe. Ademas e ta pone nan hari pa asina nan por lubida un rato nan preocupacionnan.

Rachel ta un inspiracion pa otro coleganan rond di dje. E ta un persona confiabel y alabes por traha bon cu diferente disciplinan den hospital. Tambe e ta zorg pa keda semper na altura di desaroyonan

riba tereno di cuida pa su conocimiento ta up-to-date. Como man drechi di su manager, Irinia Zievinger, e ta wordo involucra den decisionnan pa trece mehoracion ribo piso cual e ta haci di un forma creativo y semper pensando riba union bou di e team.

Rachel su dedicacion y amor pa su trabou unda cu siguridad di pashent ta na prome luga. Claramente Rachel a demostra di ta un colega ehemplar y Hunta di Directiva, management y coleganan ta hopi orguyoso di Rachel. Masha pabien Rachel cu e bunita reconocimiento aki!

HOH ta impresiona cu

Clasificados

SOLODIPUEBLO@GMAIL.COM

CEL.585 9500

PRESIDENTE NEVEN ILIC A YEGA ARUBA PA REUNIONNAN DI COMITE EHECUTIVO DI PANAM SPORTS



Ayera nochi miembronan di directiva y directornan di Comité Olimpico Arubano (COA) a ricibi Presidente di Panam Sports, Neven Ilic y su ekipo na aeropuerto. Cu esaki ta inicia e siguiente dianan di reunionnan cu diferente stakeholders importante

pa deporte y e reunion di Comité ehecutivo di Panam Sports cu lo tuma luga diamars y diaranson, unda tur 30 miembro di e Comité lo yega Aruba den transcurso di e dia di awe.

#COA #PANAMSPORTS #ARUBA

PUEBLO A HAÑA SU PEN BEK

Pa kualkier informacion
solodipueblo@gmail.com
of
585-9500

Clasificados



SOLODIPUEBLO@GMAIL.COM
CEL. 585 9500

SOLO
De Pueblo

EXITOSO MAINTA DI 2 EDICION DI FERIA DI SALUD NA SAN NICOLAS ORGANIZA PA ARUBA LIONS CLUB



Pa medio di esaki Aruba Lions Club, cual Club otro aña lo celebra su di 80 aña di su existencia, ta bisa danki y ta gradeci e pueblo di San Nicolas y vecindario pa a acudi for di mainta trempa caba na e Feria di Salud na Colegio San Augustin y a haci e evento un éxito rotundo.

Un danki special ta bay na nos colaboradornan kende nan ta: Colegio San Augustin pa facilita e lugar, Xavier University cu nan equipo Medico, Verpleegee/sternan cu a controla, sucu, colesterol, presion etc., Aruba Vision Center cu a controla e presion den wowo cu ta algo sumamente importante pa tene cuenta cu ne, Fundacion Smile Moble cu a controla, hasi limpieza y reparacion na dentadura nan falso, Fundacion ABO cu tabata presente pa promer biaha y cu a duna informacion y guia



importante pa tene cuenta cu nos tripanan, Mary Joan Foundation cu nan equipo di 3 Doctor cu tabata presente pa hasi e examinacion di pechonan pa tanto hende homber y hende muher pa preveni cancer di pecho, FEPOH y QUOTA cu a guia y hasi e testnan pa oido, na Dr. G. Fun-A-Fat cu tabata duna informacion over di uso di remedi nan corectamente, con y kiko hasi ora mester tuma mas cu un of dos pilder pa un tratamiento, LEO CLUB y tur nos Leonnan pa nan ayudo y sosten personal y moral

pa cu e exito di nos di 2 edicion di Health Fair, San Nicolas.

Mester menciona cu tur instancia cu a colabora a haci esaki gratuitamente y pesey mes tur bishitante a haña tur servicio gratis. Tambe un danki pa esnan cu a yuda tras di cortina kendenan a set-up e lugar, a prepara tur cos di come y di bebe pa tur cu a acudi na e Feria di Salud. Aruba Lions Club ta sumamente contento y satisfecho cu por a atende mas di 130 persona durante e mainta di e Feria di Salud aki.

PROME MINISTER MIKE EMAN A CONOCE CU UN MODELO MODERNO

Huis73 na Den Bosch inspira vision pa brinda mas espacio cultural y educativo Unda cultura, educacion y comunidad ta bin hunto



Durante su bishita oficial na Hulanda, Prome Minister di Aruba, mr. Mike Eman, a bishita recientemente Huis73, un centro innovador cu ta combina biblioteca, cultura, educacion y espacio creativo pa comunidad den un edificio historico completamente renoba. E encuentro tabata enfoca riba e rol cu cultura, conocimiento y creatividad por hunga den fortifica nos comunidatnan moderno. Durante e bishita, Prome Minister Eman a haya oportunidad pa conversa ampliamente cu Nan van Schendel, director di Huis73, y Peter Zwart, lider y desaroyador di e proyecto. Nan a comparti e vision tras di e centro cultural nobo, cu recientemente a habri su portanan pa publico despues di varios aña di planificacion y construccion. Segun Nan van Schendel, Huis73 no ta simplemente un biblioteca moderno, sino "un cas pa tur hende."

E centro ta enfoca riba promove lectura, cultura, educacion, pensamiento critico y creatividad dentro di comunidad. "Nos tin necesidad di crea hende cu ta pensa creativo y conecta cultura den sociedad," Van Schendel a expresa durante e bishita. "Bo mester por lesa bon, pero tambe desaroya e imaginacion y capacidad pa pensa creativo. Esey ta algo cu sociedad moderno tin mester di dje." E edificio, cu ta ocupa mas cu 8.000 meter cuadra den un structura historico restaura, ta ofrece espacio pa mucha, hoben, artista amateur, studentey tambe personan cu tin ambicion pa lesa y expresa mas creativamente. E centro ta habri diariamente for di mainta te anochi, haciendo e acesibel y pa tur hende por participa den comunidad. Peter Zwart kenda a desaroya e proyecto durante cuater aña, incluyendo dos aña di planificacion intensivo hunto cu varios arkitekto y experto tecnico a splica

cu segun dje, e clave principal tabata semper mantene e vision original central den tur decision durante e proceso di construccion.

"Un proyecto manera esaki ta logra exito ora e realmente facilita e usuario y agrega balor na ciudad," el a comenta. Prome Minister Mike Eman a expresa gran interes den e modelo di Huis73 y e manera cu cultura, educacion y desaroyo social ta integra den un solo espacio comunitario.

Segun e Prome Minister, Aruba tambe tin oportunidad pa sigui fortalece un espacio asina unda creatividad, educacion y comunidad por encontra otro. "Un edificio manera Huis73 ta muestra con inversion den conocimiento, cultura y



participacion social por crea un comunidad mas fuerte y resiliente," Prome Minister Mike Eman a expresa. "Pa Aruba, esey ta un inspiracion importante den nos esfuersonan pa sigui construi un economia di conocimiento y fortalece

cohesion social." E bishita na Huis73 forma parti di varios encuentro institucional y cultural cu Prome Minister Eman ta teniendo durante su bishita na Hulanda, enfoca riba innovacion social, educacion y cooperacion internacional.



PABIEN NA E GANADORNAN DI ELECTRO STAR PA DIA DI MAMA, E TESORO DI CAS! DEN SIMAN NAN A HASI ENTREGA NA E FELIS GANADORNAN:



E prome premio a bai na Sra Swinda Martis, e di dos premio a bai pa Sra Anna- Maria Tromp y e tercer premio a bai pa Sra Stephanie Rasmijn.

Nos kier a gradici tur nos clientenan cu a pone nan confiansa den nos compania. Aunke Electro

Star ta relativamente nobo, nan ta ofrese nan clientenan semper un surtido amplio di productonan di calidad, na miho prijs sea cash of crediet y cu tremendo servicio. Y keda pendiente pa nos campanja di Mundial cu lo sali pronto!!

**Na porta di Su cas, bo Tata ta wardabo.
Dios ta duna y Dios ta tuma. Y ora e yamada bin,
nos mester baha e cabes humildemente.**

Apesar cu e yamada a bin mucho trempa, nos mester ta agradecido pa e añanan cu nos por a disfruta di e amistad y bondad di Ryan.
Cu un dolor profundo na nos curazon nos ta participa cu a bay sosega den brasa di Señor



**Ryan Allan Acintho
Siro Flanegien, RA**

Aruba 22-10-1980 Amsterdam
18-05-2026

Na number di su:

Esposa: Nelitza Flanegien-Oduber

Yiunan: Noah Liam Flanegien

Chiara Isabella Flanegien

Mayornan: Asinto (Chin) y Richardina (Inchi) Flanegien-Oduber

Ruman: Richard y Gianni Flanegien-Dammers

Subrino/a: Gideon y Sarah Flanegien

Welonan: † Felix y † Chita Flanegien-Ruiz

† Casper y † Bertha Oduber-Yarzagaray

Suegronan: Nelson y Margriet Oduber-Britten

Cuñan: Nelienne y Lars Valkering

Padrino y madrina di bautismo:

† John Oduber y Sira Waslander-Flanegien

Padrino di confirmacion:

Roderick (Rudy) Dammers

Su omo y tantanan:

† Emiliano y † Anita Flanegien-Kellij

† Agnes y † Arie van Weenen-Flanegien

Lucila y † Vale de Kort-Flanegien

Berta y Tony Giel-Flanegien

† Victoria y † Edwin Croes-Flanegien

Mateo Flanegien

† Felix Flanegien

Sira y † Anne Waslander-Flanegien

Richard Oduber

† John Oduber

Jane Oduber

Glenda y Jacobo Tromp-Oduber

Manera tanta: Mary Lacle y Joseph Arends

Su primo y primanan:

Mena, Petra, Digna, Martin, Angel, Erwin, Norine, † Robert, Ingrid, Ronnie, Erik, Yolanda, Lidia,

Dorothy, Franklin, Lucille, Enid, Herbert, Renald, Ianthe, May-Lin, Fayona, John-Jairo, Simon,

John Patrick, Jo-Ann Mary-Ann, Jinny, Dayenna

Tur e tanta y omonan grandi y tur actoprimo/a.

Tur su amigo/anan di St. Annaschool, Colegio Arubano y tambe co-estudiante di Hulanda y tur otro bon amigo/anan cu Ryan a stima tanto y cu ta demasiado pa menciona.

**Demas famia y conocirnan ta invita pa un celebracion di bida di Ryan riba:
Diabierna 29 di Mei di 6or pa 8or P.M. na Royal Funeral Home, na cual ocasion tin oportunidad
pa condoleer famia y amistades.**

Diferente di su bon amigo/anan lo tene discurso recordando nan brother Ryan stima.

SOPI DI LETRANAN

COLOURS

B	L	A	C	K	R	P	B	L	Z	Q	I
C	L	N	X	Z	V	I	W	W	A	B	U
B	Q	U	Y	D	K	W	P	Y	X	U	L
L	K	H	E	R	T	B	U	O	E	G	E
F	I	S	L	C	L	B	R	E	D	R	Q
A	M	B	L	I	J	L	P	O	T	E	K
V	O	D	O	P	N	G	L	R	W	E	T
C	O	E	W	H	I	T	E	A	F	N	W
R	F	G	F	G	D	S	Q	N	R	I	R
Q	O	M	K	J	X	O	L	G	A	R	A
M	C	Q	Z	Q	X	M	G	E	D	Y	F
E	Y	V	G	W	B	F	S	D	S	M	X

BLACK	WHITE	BROWN
YELLOW	ORANGE	RED
BLUE	GREEN	PURPLE

SUDOKU

		8		3		5	4	
3			4		7	9		
4	1				8			2
	4	3	5		2		6	
5								8
	6		3		9	4	1	
1			8				2	7
		5	6		3			4
	2	9		7		8		

8								
		3	6					
	7			9		2		
	5				7			
				4	5	7		
			1				3	
		1					6	8
		8	5				1	
	9					4		

						3	9
	8						5
		9		6		8	
		5		9			6
7							
		8	4		6		
		3		8			5
	2		7			6	
4						1	

Oracion di dia

Feliz dia bendiciona cu hopi misericordia di Dios

Ta un pica grandi mi a haci, SEÑOR. Mi ta roga Bo, kita a fayó aki for di bo sirbido, mi a actua manera un hende sin sinti." (2 Samuel 24,10b)

Ruman algo sumamente importante ta ora nos ta reconoce cu nos a peca y acerca Señor den persona di un Sacerdote, specialmente den un confesion sincero cu nos curason arepentí basha bao tur cos cu ta stroba nos di stima. Señor no ta nenga un curason arepentí y esey nos como ser humano debil y fragil mester probecha di acerca Hesus p'asina nos por sigui disfruta di Hesus su amor pa nos, di otro manera nos ta keda den eror y esey por resulta fatal pa nos despues paso nos ta nenga di drecha nos situacion cu nos Dios. Mescos David a haci y cu Señor a tene misericordia cu e pueblo. Dichoso esun cu su culpa ta pordona (Salmo 32, 1) Ruman confesion ta haci nos liber pa nos por stima atrobe y imita Hesus den su humildad y misericordia.

Oracion: Señor Hesus haci mi bira cada dia mas consciente di pica den ki forma nan ta presenta, y rechasa eseynan cu bo gracia, p'asina mi no faya Bo sin mas y keda pega na bo amor infinito y berdadero. Y ripiti Hesus den Bo mi ta confia, tene misericordia cu mi pover pecador y cu henter mundo.

Amen.

TIENDA DI EDUCACION: AMOR INCONDICIONAL

Tin amor propio, tin amor pa bo prohimio pero tambe tin amor pa bo yiu(nan) cu ta un amor incondicional. Luna di februari ta conoci pa ta e luna di amor y amistad. Como mayor tur dia ta un dia di duna amor pa sea e baby e mucha of e adolescente. No solamente cu palabra, pero tambe cu hecho nos por demostra cu di berdad nos ta stima nan. Ta importante pa ora di muestra nan e amor cu nos tin pa nan pa busca e contacto visual pa asina confirma y fortifica e palabranan di stimacion.

Amor incondicional

Kico nicifa amor incondicional realmente? Amor incondicional significa un amor caminda no ta conoce limite of no tin condicion mara na esaki. E por wordo yama tambe amor cu compassion of wordo asocia cu amor completo. Pensa ariba e amor cu bo mayor(nan) kisas tabata of tin pa bo y naturalmente e amor cu abo mes como mayor tin pa e yiu(nan).

Como mayor ta importante pa duna amor na e yiu(nan) pero esaki no significa cu lo laga e yiu(nan) haci locual cu nan kier. Pues mester pone regla y limitacion cerca e yiu(nan) pa nan mesun proteccion. Esaki tambe ta parti di amor y lo mester wordo practica di un edad jong of for di baby caba.

Kisas ta dificil pa bisa e mucha un no of cu no por. Pero nan tin cu siña deal cu esaki. Ta importante pa duna e yiu(nan) na un momento asina un splicacion pakico. Tambe si tin posibilidad pa duna un of mas alternativa of opcion ariba locual no ta posibel.

Papia tocante amor y intimidad

Ta importante cu mayor comunica y papia tocante di amor for un edad hoben cu e yiu(nan). Pregunta(nan) lo surgi for di e mucha(nan) tocante e topico y lo yega un dia cu e mucha of hoben lo tin tambe sentimento di amor y intimidad. Esaki pa hopi mayor kisas ta un topico dificil pa papia cu e yiu(nan). Si mayor tin dificultad pa papia tocante intimidad y sexualidad semper por acudi of comunica cu Tienda di Educacion.

Nos ta bibando den un era caminda cu informacion ta tur caminda, e cuestion ta si acaso e informacion ta esun corecto. Vooral ora ta trata mucha of hoben ta importante pa nan sa cu no tur informacion ariba internet ta cuadra cu e realidad. Ta bon pa busca e fuente di unda e informacion ta bin. Tin organisacion grandi internacional cu por ehempel tin otro metanan di existencia y no tur ora ta cuadra cu e meta di duna of informa e comunidad, kisas pa por bende un servicio of producto.

Tienda di Educacion

Mayor bo no ta para pa e reto nan aki boso. Ta tareanan cu por

mostra dificil pero Tienda di Educacion t'ey na disponibilidad di comunidad di Aruba pa duna abo e sosten y guia gratis. Por contact Tienda di Educacion na 161 cu ta disponibel di dialuna pa diabierna di 8 am pa 6 pm non-stop.

Tambe por like nan Facebook page keda informa y tambe comunica di nan servicionan.

Tienda di Educacion ta situa den edificio di Centro pa Hoben y Famia na Sabana Blanco 68-C y ta na servicio di henter comunidad. Nos muchanan



ta nos futuro. Ban crea un futuro caminda cuida propio ta wordo practica constantemente.



Directiva y Consejo di Partido Patriotico di Aruba
"PPA" tin e tristo deber di anuncia fayecimento di:



Clara Mercedes Oduber-Osorio

*17-12-1935 - †22-05-2026

Na bida mama di nos Lider Politico,
Ex-Vice Prome Minister Otmar E. Oduber

Hopi Forza na tanto Otmar Oduber como na su ruman Luis Oduber.
Cu Sra. Clara sosega na paz.

FORTALEZA PA FAMIA

Scirbi pa Pastor Marcel Balootje.

LAGA NOS BIBA CONSCIENTE, CU NOS TIN UN ADVERSARIO

E palabra di Dios ta bisa nos, pa nos ta consciente di e plan di nos adversario cual ta e diabel.

Eladron ta bini solamente pa horta, pa mata y pa destrui. Ami ta bin pa nan tin bida, y pa nan tine na abundancia. (Juan 10:10).

E enemigo di nos alma no ta respeta, e ta disfrasa, y forsa asunto, e drumi wak ken ta rabia, e ta wak ken kier venga, e ta wak ken kier regla cuenta, y e ta pone su mal influencia riba curason di hende.

Si nos wak bon biblicamente, e paraíso di Eden tabata lugar caminda Dios tabata cana, y papia cu Adam cu Eva, y hasta eyden e enemigo a drenta y a usa un colebra pa asina e por a haci su maldad.

Pesey nos obediencia na Dios ta hopi importante, pasobra e enemigo ta riba un loer, y e ta loer tur hende.

E palabra di Dios ta bisa hopi cla; Sea sobrio, sea alerta, Boso adversario e diabel ta cana manera leon cu ta grunja buscando ken e por devora. (1 Pedro 5:8).

Pesey nos mester mantene un nivel di oracion halto y constante pa asina nos por reprende e diabel tur momento, y mas cu tur cos no dune ningun oportunidad pa haci su destruccion.

Pablo a scirbi den 2 Timoteo 3 vers 1-5, cu den e ultimo dianan lo bini tempo trabahoso, y e a menciona tur locual lo bay sosode, y con e ser humano lo bay cambia, y kico hende lo ta capas di haci.

Y di tur di e cosnan cu Pablo a scirbi, nos tin di tene cuenta caminda e ta bisa cu hende lo bira sin amor, ireconciliabel, cu mala lenga, sin dominio

propio.

Esey ta nifica cu hende lo no tin respet, nan lo no tin amor pa otro, nan lo papia malo cu otro, nan no conoce kico ta nifica perdona, y nevermind un asunto, ni tampoco cana bay, pero nan ta actua sin dominio propio, pasobra e mal influencia di diabel lo pone esnan cu no kier obedece e palabra di Dios, tuma decision cu nan lo afecta henter nan bida.

Tur esaki Dios a pone den su palabra, atraves di su siervo Pablo na kende E a duna revelacion, con tempo lo bay bira, pasobra di berdad tur hende ta mira con hende a cambia, y nan no kier obedece Dios, ni tampoco obedece ley.

Pablo ta duna nos un splicacion cla cu ta demostra cu hende lo bira contra Dios, sin tene cuenta cu nan ta bira contra nan mes.

Awor no ta un tempo pa nos sinta man crusa, y laga e enemigo haci locual cu e kier,

pasobra nos a wordo avisa di esaki, pa nos tene cuenta y tuma accion den nomber di Cristo Hesus.

No ta tempo pa nos para critica, wak rond ken tin falta, pasobra nos tur ta na altura for di unda e maldad ta bini.

Pesey e palabra di Dios ta bisa den Santiago 4:7, Pesey somete boso mes na Dios, resisti e diabel y e lo huy for di boso, Hala serca Dios y e lo hala serca boso.

Pero con nos por hala serca Dios, ora nos curason ta leu for di Dios, y nos kier biba segun nos propio reglanan cu nos mes, a establece.

Ta tempo pa arepentí y bira bek for di mal caminda, ta tempo pa respeta Dios y obedece e palabra di Dios.

Ta tempo pa para firme, dedica tempo den oracion, tempo pa famia, tempo den e Palabra.

Sinceramente, Pastor Marcel Balootje.



DANKI SR. GREGORIO "ITO" TROMP



Na bida nos a y ta stim'e
Na bida nos a y ta apreci'e
Na bida nos a y ta demonstr'e
Cu ARUBA ta orguyoso di dje
Un shon di hende
Un arubiano original
Semper atento
Semper punctual
Contento cu su homenahe bon mereci
Contento cu anjanan di amistad comparti
Bek den tempo di Radio Kelkoom cu e exitoso
programa BUTISHI DI ALEGRIA
Un programa cu bon sintonia
E mihor Maestro di ceremonia cu Aruba a conoce
tempo di su tempo
Un cabayero dushi semper alegre y contento
Un persona directo y sincero
Un maestro den nos dushi idioma Papiamento
Alumnonan den su cursonnan cu respet pa Shon
Ito, hopi atento
Cu laman y tera entre nos al momento no ta
stroba'mi, ami Ruthy Vrieswijk Bergen di bras'e
den pensamiento y curason
Felicite y lag'e sa con bendiciona mi ta pa conos'e
ITO TROMP, bo ta un cabayero unico, bon studia
y bendiciona cu bon salud, alegria y hopi sabiduria
Cu un amor y pasion inmenso pa nos lenga
materno tur dia
Pabien mi bon mentor y maestro di nos dushi
Papiamento
Pabien na mi bon locutor y presentador y
animador di Butishi di alegria
Ta masha hopi hende a sinya fey bo excelente
trabaunan y bon ehempelnan pa hopi anja
ITO, bo curason semper na e bon lugar
Humilde, gradicido y orguyoso arubiano unico y
super special
Manera ITO TROMP no tin dos igual.

Cu respet, amor y carinjo
Ruthy Bergen Vrieswijk
Lady Ruth
Mei 2026